



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH, na 12. redovnoj sjednici održanoj 24. maja 2017. godine, usvaja

## **ZAKON** **O MLADIMA BRČKO DISTRIKTA BOSNE I HERCEGOVINE**

### **DIO PRVI – OPĆE ODREDBE**

#### **Član 1** **(Predmet)**

Ovim zakonom propisuju se prava i obaveze mladih, omladinsko organizovanje, briga za mlade, institucionalno učešće mladih u donošenju odluka i druga pitanja od interesa za život, položaj i djelovanje mladih u Brčko distriktu Bosne i Hercegovine (u daljnjem tekstu: Distrikt).

#### **Član 2** **(Definicije)**

Pojedini izrazi upotrijebljeni u ovom zakonu imaju sljedeće značenje:

- a) „omladina ili mladi“ su lica od 15 do navršениh 30 godina;
- b) „omladinski rad“ podrazumijeva oblike društveno korisnog rada iz oblasti interesovanja omladine u koji su uključeni i kojim se doprinosi unapređenju položaja mladih;
- c) „omladinski radnik“ je osoba koja radi s mladim ljudima na načine neformalnog i formalnog sadržaja, fokusirajući se na lični i društveni razvoj kroz odnos jedan na jedan i grupne aktivnosti;
- d) „rad s mladima“ je planirana, svrsishodna i svjesna podrška mladima kroz njihovo dobrovoljno sudjelovanje;
- e) „omladinske manifestacije“ su oblici omladinskih aktivnosti u kojima se realizuju programi namijenjeni mladima;
- f) „neformalno obrazovanje mladih“ je skup organizovanih i mladima prilagođenih obrazovnih aktivnosti, koje nisu predviđene sistemom formalnog obrazovanja, zasnovanih na potrebama i interesovanjima mladih, principima dobrovoljnog i aktivnog učešća mladih u procesu učenja i promociji demokratskih vrijednosti, kroz koje mladi stiču kompetencije neophodne za razvoj ličnih potencijala, aktivno učešće u društvu i bolju zaposlenost.

### **Član 3 (Cilj zakona)**

Cilj zakona je stvaranje uslova za institucionalnu i sistemsku brigu o mladima, način omladinskog organizovanja i društvenog djelovanja, učešće mladih u donošenju odluka koje se odnose na mlade i zastupanje interesa i prava mladih.

## **DIO DRUGI – GLAVNI DIO**

### **POGLAVLJE I. OMLADINSKO ORGANIZOVANJE**

#### **Član 4 (Omladinsko organizovanje)**

Omladinsko organizovanje u Distriktu zasniva se na poštovanju osnovnih ljudskih prava i sloboda, kao i izvornih načela demokratije zasnovanih na Ustavu Bosne i Hercegovine (u daljnjem tekstu: Ustav), Statutu Brčko distrikta Bosne i Hercegovine (u daljnjem tekstu: Statut) i međunarodnim konvencijama iz oblasti omladinskih djelatnosti.

#### **Član 5 (Ciljevi omladinskog organizovanja)**

Ciljevi omladinskog organizovanja su:

- a) podsticanje sistematskog unapređenja i razvoja omladinskog organizovanja i omladinske politike uz aktivno učešće mladih;
- b) animiranje mladih;
- c) afirmacija omladinskih aktivnosti;
- d) zastupanje interesa i prava mladih;
- e) promocija učešća mladih u procesu odlučivanja.

### **POGLAVLJE II. PRAVA I OBAVEZE MLADIH**

#### **Član 6 (Prava mladih)**

(1) Mladi imaju pravo na podršku i unapređivanje svog razvoja bez diskriminacije po bilo kojem osnovu.

(2) Ostvarivanje prava iz stava 1 ovog člana vrši se:

- a) unapređenjem individualnog i socijalnog razvoja mladih i sprečavanjem njihovog mogućeg zapostavljanja;

- b) provođenjem politika kojima se djeluje na negativne trendove po mlade;
- c) održavanjem i stvaranjem pozitivnih životnih uslova za mlade, kao i okruženja koje je ugodno za mlade;
- d) zaštitom mladih od opasnosti karakterističnih za njihovu dob, a kojima mogu biti izloženi.

(3) U radu s mladima postupa se u skladu s Ustavom, zakonom, međunarodnim poveljama i konvencijama koje se tiču prava mladih i ljudskih prava.

### **Član 7 (Obaveze mladih)**

U skladu s ovim zakonom mladi imaju obavezu da:

- a) aktivno djeluju na jačanju svojih sposobnosti, na svom obrazovanju te na razvoju integriteta vlastite ličnosti;
- b) aktivno doprinose izgradnji i njegovanju društvenih vrijednosti te razvoju svoje zajednice;
- c) poštuju i zagovaraju vrijednosti mira i tolerancije u komunikaciji sa svim ljudima i ne diskriminiraju ih po bilo kojem osnovu;
- d) izražavaju solidarnost i posebnu brigu prema mlađim i starijim licima, licima s posebnim potrebama, pripadnicima nacionalnih manjina, marginalizovanim grupama i pojedincima, pripadnicima konstitutivnih naroda i ostalih koji predstavljaju manjinu u lokalnoj zajednici gdje žive i rade te prema drugim licima koja imaju potrebu za solidarnošću i razumijevanjem od svojih sugrađana/ki;
- e) unapređuju sredinu u kojoj žive.

## **POGLAVLJE III. OMLADINSKE ORGANIZACIJE**

### **Član 8 (Omladinska organizacija)**

- (1) Omladinska organizacija je organizacija registrovana kao udruženje u skladu sa Zakonom o udruženjima i fondacijama Brčko distrikta Bosne i Hercegovine (u daljnjem tekstu: Zakon o udruženjima).
- (2) Mladi čine najmanje dvije trećine članova omladinskih organizacija i članova organa upravljanja omladinskih organizacija.
- (3) Aktivnosti i statutarne djelatnosti omladinskih organizacija usmjerene su na mlade i na volonterskoj su osnovi.

(4) Omladinska organizacija je neprofitabilna, apolitična i nestranačka organizacija.

### **Član 9 (Udruživanje)**

Omladinske organizacije udružuju se na različitim principima kao što su: strukovni, interesni i drugi, u skladu sa zakonom.

### **Član 10 (Javnost rada)**

Rad omladinskih organizacija je javan.

### **Član 11 (Samostalnost u radu)**

- (1) Omladinska organizacija samostalno utvrđuje svoje ciljeve i djelatnost u skladu s Ustavom, Statutom i zakonom.
- (2) Aktivnost omladinske organizacije ne može biti u suprotnosti s ustavnim poretkom niti usmjerena na podiranje ustavnog poretka, raspirivanje nacionalne, rasne, vjerske i spolne diskriminacije.
- (3) Omladinska organizacija ne može se uključivati niti angažovati u predizbornoj kampanji političkih stranaka i nezavisnih kandidata niti im pružati podršku.

### **Član 12 (Obezbjedenje sigurnosti i zaštite prava i sloboda)**

Omladinska organizacija prilikom realizacije svojih programa i aktivnosti dužna je obezbijediti sigurnost i zaštitu prava i sloboda svim članovima i korisnicima, u skladu sa zakonom.

### **Član 13 (Prava omladinskih organizacija)**

Omladinske organizacije i njeni članovi imaju pravo na:

- a) slobodu mišljenja i društvenog djelovanja;
- b) uključivanje u rad i aktivnosti organa vlasti, institucija i ustanova na svim nivoima i donošenje odluka bitnih za razvoj omladinske politike;
- c) javno iznošenje stavova i kritiku rada i djelovanja svih segmenata društvene zajednice;
- d) izdavanje svojih glasila.

### **Član 14 (Obaveze omladinskih organizacija)**

(1) Obaveze omladinskih organizacija odnose se na konkretne aktivnosti:

- a) omladinski rad;
- b) afirmaciju omladinskog volonterizma;
- c) organizaciju humanitarnih akcija s ciljem općedruštvene koristi;
- d) organizovanje sportskih manifestacija;
- e) borbu protiv bolesti zavisnosti;
- f) resocijalizirajuće aktivnosti u oblasti maloljetničke delinkvencije;
- g) druge aktivnosti koje su od koristi za širu društvenu zajednicu;
- h) neformalno obrazovanje mladih.

(2) Omladinske organizacije imaju obavezu čuvanja poslovne dokumentacije pet godina.

#### **Član 15** **(Ostvarivanje prava)**

Omladinska organizacija ostvaruje svoja prava i obaveze u međunarodnoj omladinskoj saradnji samostalno ili putem Vijeća mladih Brčko distrikta BiH (u daljnjem tekstu: Vijeće mladih), mreža omladinskih organizacija, kao i mreža međunarodnih omladinskih organizacija.

### **POGLAVLJE IV. POLITIKA PREMA MLADIMA I STRATEGIJA ZA MLADE**

#### **Član 16** **(Politika prema mladima)**

Politika prema mladima predstavlja ukupnost svih mjera i institucionalnih mehanizama brige vlasti prema mladima, koji su usmjereni na poboljšanje i unapređenje položaja i statusa mladih.

#### **Član 17** **(Briga o mladima)**

(1) Briga o mladima je od općeg interesa za Distrikt.

(2) Briga o mladima se ostvaruje:

- a) uređivanjem i stvaranjem uslova za omladinsko organizovanje;
- b) donošenjem i realizacijom strategije za mlade.

#### **Član 18** **(Strategija za mlade)**

(1) Strategija za mlade je dokument s programskim pristupom djelovanja prema mladima što uključuje definisane probleme i potrebe mladih, strateške pravce djelovanja, ciljeve strategije i mjere za realizaciju ciljeva strategije.

(2) Strategija za mlade se izrađuje na osnovu istraživanja o potrebama i problemima mladih.

(3) Strategija za mlade sadrži programe djelovanja za mlade u oblastima iz člana 20 ovog zakona.

- (4) Strategiju za mlade izrađuje Odjeljenje za stručne i administrativne poslove (u daljnjem tekstu: Odjeljenje) u saradnji s Vijećem mladih i dostavlja Vladi Brčko distrikta Bosne i Hercegovine (u daljnjem tekstu: Vlada) na razmatranje i odobravanje.
- (5) Vlada odobrava predloženu strategiju za mlade i dostavlja je Skupštini Brčko distrikta Bosne i Hercegovine (u daljnjem tekstu: Skupština) na razmatranje i usvajanje.
- (6) Skupština usvaja strategiju za mlade na prijedlog Vlade za period od pet godina.
- (7) Vlada Brčko distrikta BiH je dužna obezbijediti finansijska sredstva za provođenje istraživanja i izradu Strategije za mlade.

## **POGLAVLJE V. PROGRAMI DJELOVANJA ZA MLADE**

### **Član 19 (Programi djelovanja za mlade)**

- (1) Realizacija strategije za mlade ostvaruje se kroz programe djelovanja za mlade koji se donose svake godine.
- (2) Programi djelovanja za mlade predstavljaju plan provođenja mjera koje su definisane strategijom za mlade.
- (3) Programe djelovanja za mlade izrađuju nadležna odjeljenja i institucije u saradnji s Vijećem mladih.
- (4) Programe djelovanja za mlade donosi Vlada, na prijedlog nadležnog odjeljenja i institucije.

### **Član 20 (Sadržaj programa djelovanja za mlade)**

Programom djelovanja za mlade posebno se definišu:

- a) zadaci i mjere za realizaciju strategije za mlade po oblastima;
- b) opći, materijalni, kadrovski, prostorni i drugi uslovi za njihovo ostvarivanje;
- c) tijela nadležna za realizaciju programa strategije za mlade;
- d) podrška radu omladinskih organizacija i institucija koje se bave razvojem politike prema mladima, na osnovu utvrđenih kriterija;
- e) saradnja s omladinskim organizacijama;
- f) izvršioci programa, način njihovog izbora i rokovi za realizaciju;
- g) unapređenje stručnog i istraživačko-razvojnog rada, informacionih sistema i informisanja;
- h) podrška omladinskim projektima i manifestacijama;
- i) međunarodna omladinska saradnja;
- j) omladinski rad;
- k) neformalno obrazovanje mladih;
- l) vrijeme za koje se donose programi.

### **Član 21 (Oblasti za izradu programa)**

Nadležni organi, institucije i druga pravna lica, u saradnji s Vijećem mladih, izrađuju i realizuju programe u oblasti:

- a) zapošljavanja, sačinjavanjem programa protiv nezaposlenosti mladih i pružanjem podrške organizovanju i aktivnostima, odnosno radu omladinskih organizacija, posebno onih koje se bave hendikepiranim mladim ljudima;
- b) zdravlja mladih, i to:
  - 1) kroz organizovano pripremanje i razvijanje konsultacije među omladinskim organizacijama i izabranim predstavnicima, socijalnim i profesionalnim grupama, koje se bave socijalnom zaštitom i promovisanjem zdravlja, kao i pripremanjem, razvijanjem i promovisanjem savjetovanja i informisanja mladih socijalnih radnika i dobrovoljaca, koji pripremaju preventivne i rehabilitacione strategije;
  - 2) borbu protiv zloupotrebe droge i alkohola među mladim ljudima, kroz saradnju s omladinskim organizacijama, pripremanjem, razvijanjem i promovisanjem programa o problemima;
- c) obrazovanja, stručnim radom i usavršavanjem u okviru svojih nadležnosti ostvarivanjem općeg interesa u oblasti školstva, promovišući neformalno obrazovanje, obrazovanje u oblasti ljudskih prava i ohrabrivanje mladih ljudi da ostvaruju puno učešće u školskom životu i srodnim aktivnostima, kao što su vannastavne aktivnosti i razmjena učenika;
- d) sporta i kulture, pripremanjem programa u oblasti sporta i kulture, s ciljem što masovnijeg uključivanja mladih u sportski i kulturni život Distrikta;
- e) svim drugim oblastima koje se tiču aktivnosti mladih, a nisu prije navedene.

## **Član 22 (Nadležnosti Odjeljenja)**

- (1) Odjeljenje u saradnji s nadležnim organima i institucijama i drugim pravnim licima:
  - a) uspostavlja stručno radno tijelo za ažuriranje i praćenje provođenja strategije za mlade u čijem radu učestvuju predstavnici Vijeća mladih;
  - b) osigurava istraživanje ili podršku istraživanju s ciljem donošenja strategije za mlade;
  - c) pruža podršku radu Vijeću mladih.
- (2) Stručno radno tijelo iz stava 1 tačke a) ovog člana imenuje šef Odjeljenja.

## **Član 23 (Registar omladinskih organizacija)**

- (1) Odjeljenje uspostavlja Registar omladinskih organizacija (u daljnjem tekstu: Registar).
- (2) Omladinske organizacije upisane u Registar predlažu projekte za mlade.
- (3) U Registar se upisuje: naziv omladinske organizacije, sjedište, broj telefona, datum osnivanja, podaci o licu ovlaštenom za zastupanje, lista osnivača, broj rješenja o upisu u sudski registar, jedinstveni identifikacioni broj i dr.
- (4) Kriteriji za upis u registar utvrđuju se odlukom koju donosi šef Odjeljenja.

## **Član 24 (Postupak za upis u registar i brisanje iz registra)**

(1) Postupak za upis u registar pokreće se prijavom za upis, koju podnosi Odjeljenju ovlašteno lice omladinske organizacije.

(2) Uz prijavu za upis u registar prilažu se:

- a) osnivački akt;
- b) statut;
- c) spisak lica koja su ovlaštena za zastupanje;
- d) lista osnivača;
- e) programski ciljevi;
- f) rješenje o upisu u sudski registar.

(3) Omladinska organizacija briše se iz registra na osnovu konačnog rješenja o prestanku rada, zabrani rada, odluci o statusnim promjenama i slično.

(4) Način vođenja registra, sadržaj obrazaca, isprave koje se prilažu i sadržaj prijave za upis utvrđuje Odjeljenje.

## **POGLAVLJE VI. INSTITUCIONALNO UČEŠĆE MLADIH U DONOŠENJU ODLUKA**

### **Član 25**

#### **(Učešće mladih u donošenju odluka)**

S ciljem poboljšanja uloge i statusa mladih u Distriktu, nadležni organi osiguravaju uslove za učešće mladih u raspravama, debatama i donošenju odluka koje se odnose na mlade.

### **Član 26**

#### **(Komisija za mlade)**

(1) Komisiju za mlade pri Skupštini Brčko distrikta Bosne i Hercegovine imenuje Skupština, kao stalnu komisiju.

(2) Sastav i nadležnosti Komisije za mlade utvrđuju se Poslovníkom o radu Skupštine Brčko distrikta Bosne i Hercegovine.

### **Član 27**

#### **(Službenik za mlade)**

Službenik za mlade je državni službenik u organima javne uprave koji se bavi pitanjima mladih.

### **Član 28**

#### **(Dužnosti službenika za mlade)**

(1) Službenik za mlade usklađuje podršku mladima s višim nivoima vlasti u Brčko distriktu BiH i vrši koordinaciju s drugim institucijama javne uprave i javnim organima vlasti koji u svojoj nadležnosti imaju neku od oblasti definisane u strategiji za mlade.

(2) Službenik za mlade:

- a) prati pružanje podrške mladima koja dolazi iz nevladinog sektora, njen kvalitet, njenu samostalnost u određivanju ciljeva i izvršavanju njenih zadataka, kao i u formiranju organizacione strukture;
- b) vodi spisak svih udruženja, institucija, ustanova, međunarodnih i drugih organizacija koje rade s mladima ili pružaju podršku omladinskim aktivnostima;
- c) koordinira aktivnosti u vezi s radom s mladima i omladinskim aktivnostima;



- d) prati negativne uticaje na mlade bilo koje institucije, udruženja ili organizacije, uključujući i međunarodne organizacije, koje su u suprotnosti s Ustavom i zakonom i predlaže preduzimanje zakonskih mjera koje provode nadležni organi;
- e) savjetuje mlade i njihove predstavnike, naročito o pravnim postupcima ostvarivanja prava i izvršavanja obaveza zasnovanih na ovom i drugim zakonima;
- f) vodi registar omladinskih organizacija;
- g) unapređuje lični profesionalni razvoj i usavršavanje;
- h) prati jačanje kapaciteta svih onih koji se bave radom s mladima i omladinskim aktivnostima.

## **POGLAVLJE VII. VIJEĆE MLADIH BRČKO DISTRIKTA BiH**

### **Član 29 (Vijeće mladih)**

- (1) Vijeće mladih označava udruženje mladih zasnovano na dobrovoljnom članstvu omladinskih organizacija, koje predstavlja interese mladih i omladinskih organizacija.
- (2) Sva pitanja od značaja za rad Vijeća mladih bliže se uređuju statutom koji donosi njegova skupština.
- (3) Vijeće mladih donosi poslovnik o radu.

### **Član 30 (Osnivanje i članstvo)**

- (1) Osnivanje i registracija Vijeća mladih se vrši u skladu sa Zakonom o udruženjima.
- (2) Omladinska organizacija može biti član Vijeća mladih ako je upisana u registar iz člana 23 ovog zakona.
- (3) Vijeće mladih osniva više od 50% (pedeset posto) omladinskih organizacija iz člana 8 ovog zakona.
- (4) Omladinske organizacije mogu osnovati samo jedno Vijeće mladih na teritoriji Distrikta.

### **Član 31 (Dužnosti Vijeća mladih)**

Vijeće mladih dužno je učestvovati u:

- a) planiranju, razvoju i primjeni strategije za mlade i programa djelovanja za mlade;
- b) zastupanju interesa i prava omladine i njihovom institucionalnom učešću u životu i radu Distrikta;
- c) animiranju mladih za omladinski rad;
- d) informisanosti mladih;
- e) koordinaciji i realizaciji omladinskih projekata;
- f) koordinaciji s nadležnim organima i organizacijama u Distriktu;

g) međunarodnoj omladinskoj saradnji i dr.

### **Član 32 (Informisanje)**

- (1) Vijeće mladih, utvrđuje program i oblik informisanja mladih u Distriktu.
- (2) Program informisanja mladih osigurava nesmetan tok informacija putem različitih medija koje su od značaja za unapređenje omladinske politike u Distriktu, razvoj omladinske saradnje i jačanje omladinskog sektora.

## **POGLAVLJE VIII. OMLADINSKE MANIFESTACIJE, MEĐUNARODNA OMLADINSKA SARADNJA I NADZOR**

### **Član 33 (Oblici omladinskih manifestacija)**

Oblici omladinskih manifestacija su: omladinski kampovi, kulturno-umjetničke priredbe, sportska takmičenja i slično.

### **Član 34 (Organizovanje)**

Organizovanjem omladinskih manifestacija bave se omladinske organizacije i druga fizička i pravna lica.

### **Član 35 (Međunarodna omladinska saradnja)**

- (1) Međunarodna omladinska saradnja predstavlja različite oblike saradnje s mladima na međunarodnom nivou.
- (2) Međunarodna omladinska saradnja obuhvata: učešće omladinskih organizacija u radu međunarodnih institucija i organizacija, stručno usavršavanje u inostranstvu iz oblasti omladinskog rada, studijske posjete, učešće na konferencijama međunarodnog karaktera, saradnju s međunarodnim institucijama i organizacijama, razmjenu volontera i druge oblike saradnje.

### **Član 36 (Nadzor)**

Nadzor nad primjenom ovog zakona, kao i zakonitošću rada omladinskih organizacija vrši Odjeljenje.

## **POGLAVLJE IX. KAZNENE ODREDBE**

### **Član 37 (Novčane kazne za pravna lica)**

- (1) Novčanom kaznom od 1.000 KM do 15.000 KM kaznit će se za prekršaj pravno lice ako u radu s mladima postupa suprotno članu 6 ovog zakona.
- (2) Za prekršaje iz stava 1 ovog člana kaznit će se i odgovorno lice u pravnom licu novčanom kaznom u iznosu od 300 KM do 3.000 KM.
- (3) Za prekršaje iz stava 1 ovog zakona kaznit će se i fizičko lice novčanom kaznom u iznosu od 100 KM do 1.000 KM.

**Član 38**  
**(Novčane kazne za omladinske organizacije)**

Novčanom kaznom od 300 KM do 3.000 KM kaznit će se za prekršaj omladinska organizacija:

- a) kada obavlja djelatnosti koje nisu u skladu s načelima i ciljevima utvrđenim njenim statutom (član 11 stav 1 ovog zakona);
- b) ako se bavi aktivnostima usmjerenim na podriivanje ustavnog poretka, raspirivanje nacionalne, rasne, vjerske i spolne diskriminacije (član 11 stav 2 ovog zakona);
- c) ako se uključi ili angažuje u predizbornoj kampanji političkih stranaka i nezavisnih kandidata, ili im pruža podršku (član 11 stav 3 ovog zakona).

**DIO TREĆI – PRELAZNE I ZAVRŠNE ODREDBE**

**Član 39**  
**(Rokovi)**

- (1) Odjeljenje je dužno izraditi Strategiju za mlade u roku od šest mjeseci od dana stupanja na snagu ovog zakona.
- (2) Vlada je dužna da utvrdi program rada za realizaciju Strategije za mlade u roku od 60 dana od dana usvajanja Strategije za mlade.
- (3) Šef Odjeljenja je dužan donijeti odluku iz člana 23 ovog zakona u roku od 30 dana od dana stupanja na snagu ovog zakona.

**Član 40**  
**(Stupanje na snagu)**

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-138/17  
Brčko, 24. 5. 2017. godine

PREDSJEDNIK  
SKUPŠTINE BRČKO DISTRIKTA BiH

**Esed Kadrić**